

# La’o Hamutuk

Institutu ba Monitor no Analiza Dezenvolvimentu Timor-Leste

Rua Dom Alberto Ricardo, Bebora, Dili, Timor-Leste

Tel : +670 332 1040

Email: [laohamutuk@gmail.com](mailto:laohamutuk@gmail.com) Website: [www.laohamutuk.org](http://www.laohamutuk.org)

---



**Submisaun ba Komisaun C**  
**Parlamentu Nasionál Timor-Leste**  
**Husi**  
**La’o Hamutuk**  
**Kona-ba**  
**Proposta Orsamentu Jerál Estadu 2020**  
**30 Outubru 2019**

## Konteúdu

Introdusaun.....	2
Levantamentu ba OJE 2020 fó ameasa ba FP nia sustentabilidade.....	3
Suspende projetu sira ne’ebé la viável .....	5
Hametin sistema monitorizasaun molok aumenta osan .....	6
Labele husik tusan ba ita nia jersaun oin mai .....	6
Investe iha Rekursu Umanu no Servisu Báziku Sira .....	7
Edukasaun.....	7
Bee Moos no Saneamentu.....	8
Saúde.....	8
Promove setór produtivu mak dalan sustentável liu atu atinje governu nia objetivu sira.....	9
Agrikultura.....	9
Turizmu.....	10
Konkluzaan no Rekomendasaaun.....	10

## **Introdusaun**

La'ó Hamutuk hanesan organizasaun sosiedade sivíl Timor oan nian, ne'ebé tau matan ba prosesu dezvoltamentu iha Timor-Leste besik tinan 20 ona. Ami hakarak agradece ba oportunidade ne'ebé fó ba ONG sira ne'ebé hamahan an iha FONGTIL atu hato'ó paresér ba proposta Orsamentu Jerál Estadu nian ba 2020. Dezde inísiu La'ó Hamutuk fiar ba papél importante Parlamentu Nasionál nian atu halo analiza no diskusaun kle'an kona-ba konteúdu husi proposta OJE sira molok halo aprovasaun. Iha Submisaun ne'e ami sei hato'ó ami apresiasaun ba pontu pozitivu sira ne'ebé refleta iha proposta OJE ne'e, ami nia preocupasaun no rekomendasaun kona-ba proposta OJE ida ne'e no mós parte balu ne'ebé presiza hadi'ak ka presiza esplikaun klaru liu.

Ami apresia katak transparénsia Governu nia iha tinan ida ne'e di'ak liu kompara ho tinan sira iha kotuk, ida ne'e refleta iha Ministériu finansa nia asaun hodi publika Pre-Budget Statement no publika livru OJE 2020 lonon balun hafoin entrega ba Parlamentu Nasionál. Maske nune'e presiza iha liu tan partisipasaun mutua entre autoridade sira ho sidadaun inklui sosiedade sivíl, akadémiku, peskizadór no grupu seluk iha sosiedade nia laran.

Ami preocupa ita nia ekonomia seidak iha sinál atu hasees an husi dependénsia ba petróleu no gasta másimu ba servisu rekorente nian. Projetu boot sira, eletrisidade, estrada, portu aeroportu, edifísiu no konstrusaun sira seluk, ita labele haree de'it ba iha kustu harii nian maibé presiza haree mós ba manutensaun no kustu operasaun sira, nune'e sukat ho ita nia kapasidade real atu aseguira sustentabilidade projetu sira nian.

Tinan fiskál ida ne'e, ita proposta atu levanta 88% husi Fundu Petrolíferu ba OJE 2020. Orsamentu ba 2020 ho total Biliaun \$1.95 sai hanesan alokasaun aas liu iha istória orsamentál Timor-Leste nian. Ho tendénsia hanesan ne'e, ami preocupa katak Fundu Petrolíferu bele hotu lalais liu no la konsege realiza objetivu atu benefisia jersaun atuál no futuru. Ministériu finansa rasik mós hatete katak se senáriu ne'ebé Governu adopta agora mak kontinua, fundu petróleu sei hotu iha tinan 8 tuir mai, remata iha 2027.

Ami aseita ho Polítika Governu nian kona-ba gastu ba dezvoltamentu lokál, liuliu ba agrikultura, edukasaun no bee moos. Maske nune'e presiza iha liu tan sistema kontrolu no monitorizasaun ida ne'ebé rigor, atu aseguira gastu sira nia akontabilidade no efetividade. Ami mós husu atu Governu mantén polítika atu konsentra ba dezvoltamentu lokál ne'ebé bele ajuda solusiona nesesidade urjénsia povu nian. Maske nune'e, sujere atu Governu suspende

projetu boot sira ne'ebé la'ós urjente no konsentra ba nasaun nian urjensia nune'e bele asegura sustentabilidade Fundu Petrolíferu no hetan disponibilidade finansiál ba nesesidade báziku sidadaun sira nian.

**Levantamentu ba OJE 2020 fó ameasa ba FP nia sustentabilidade**

**Reseita iha Orsamentu ba 2020**

tokon \$1,950 total




Figura 1. La'ó Hamutuk nia Analiza ba Reseita Orsamentu ba OJE 2020

Finansiamentu ba Orsamentu Jerál Estadu 2020 (OJE 2020) 88% mai hotu husi Fundu Petrolíferu.<sup>1</sup> Rendimentu úniku ba Fundu ida ne'ebé mai husi kampu Bayu-Undan atinje ona nia pontu másimu iha tinan hitu liu ba (2012), no sei remata produsaun iha 2021 tanba rezerva mamuk ona. Rendimentu seluk ba Fundu ne'e mai husi retornu husi investimentu Fundu Petrolíferu, maibé nia retornu depende ba merkadu nia volatilidade. Dala ruma investimentu fó retornu di'ak no dalan ruma negativu. Maske hetan rezultadu pozitivu, retornu ne'ebé atu hetan nafatin depende ba kapitál hira mak investe. Se la kontrola gastu no levantamentu husi Fundu Petrolíferu, sei sa'e ba beibeik, kapitál husi Fundu ida ne'e sei mohu lalais liu no kuandu kapitál Fundu laiha ona, merkadu investimentu pozitivu ka negativu la importa ona ba ita. Nudár ezemplu mekanizmu utilizausaun ba Fundu ne'ebé ita bele kontrola mak gastu ka levantamentu husi Fundu Petrolíferu, infelizmente, Parlamentu Nasionál ho nia kompeténsia fó dalan ba Governu liu husi kompañia estadu hanesan TimorGAP atu foti direta husi ita nia Fundu.

<sup>1</sup> Se ita asume katak saldu iha Tezouru mai husi FP, no deve sei selu fali ho proporsaun hanesan husi FP ba orsamentu estadu atual, 88% husi OJE 2020 finansiadu husi FP.

Projeksaun sira ba levantamentu husi Fundu Petrolíferu iha tinan hirak tuir mai mós sei fó ameasa boot ba Fundu soberanu ida ne'e no Fundu ne'e sei la atinje ninia objetivu prinsipál: benefisia jerasaun atuál no futuru. Tuir senáriu ne'e, kada tinan orsamentu estadu sei sa'e ho nivel hanesan ho kreximentu husi 2019 ba 2020. Bazeia ba apresentasaun husi Ministériu Finansa nian iha 3 Outubru 2019, se tuir senáriu iha leten, Fundu Petrolíferu sei remata iha tinan 8 tui mai (2027).

Perspektiva Ministeriu Finansas konaba financiamentu Oinsa?

- Senariu 1: Despezas ba 2021-24 sa'e tuir taxa kresimentu Despezas hanesan 2019 ba 2020

AppKat	OJE 2020 (la inklui emprestimus)	Inkrementu OJE 2021-24
SV	241.3	12%
BS	732.4	49%
KM	53.3	65%
KD	386.2	-4%
TP	463.8	26%
Emprest.	73.0	-16%
Total	1,950.0	29%

- Wainhira despezas ba 2021-24 sa'e ho taxa kresimentu hanesan tinan 2020:
  - PF sei remata iha tinan 2027
  - **PF sei remata iha tinan 8 nia laran**




Figura 2. projeksaun tuir senáriu 1 Ministériu Finansa, Outubru 2019

Tinan kotuk Parlamentu Nasionál altera Lei Atividade Petrolíferu no. 13/2005, tinan ida ne'e koko altera lei rua dala ida tan. Maske tribunal deside katak proposta alterasaun lei ne'e inkonstitusional no Prezidente da Repúblika veta proposta alterasaun ne'e, Parlamentu haruka fali ona proposta ne'ebé hanesan ba alterasaun lei rua ne'e ba PR. Alterasaun sira ne'e halo ho objetivu atu hafasil TimorGAP nia asesu ba Fundu Petrolíferu ba ninia projetu. Ida ne'e sinál ida katak lider sira kontinua fiar katak petróleu mak sei sai nafatin fonte atu hetan osan hodi sustenta Timor-Leste, nune'e la fó importánsia ba setór produtivu sira. Aumentu maka'as iha transferénsia publika liu husi MPM ne'ebé sa'e maka'as dala hitu iha tinan rua nia laran. Ba OJE 2020, sira propoin atu hasa'e too tokon \$87, ne'ebé laiha esplikaun kle'an no razaun ba aumentu ida ne'e. Livru OJE 1 dehan katak tokon \$64 ba TimorGAP no balu ba instituisaun seluk (inklui TimorGAP). Parlamentu Nasionál presiza atu hare didi'ak ho kuidadu no detallu molok atu foti desizaun ba aprovasaun.

## Suspende projetu sira ne'ebé la viável

Projetu boot sira hanesan estrada, portu, aeroportu, auto-estrada, eletrisidade no edifísiu sira gasta kapitál dala ida de'it hodi harii maibé kustu ba manutensaun no operasaun kontinua la' o no aumenta aas ba beibeik. Iha ita nia istória despeza nian, governante sira husu de'it osan atu harii ka gasta ba sira nia setór maibé la diskute kle'an se gastu sira ne'e bele ajuda lori solusaun ba problema nasaun nian no aseguira Fundu Petrolíferu nia ezisténsia ka lae. Nudár ezemplu, gastu ba eletrisidade iha tinan 2020 sa'e ba tokon \$196 enkuantu iha tinan 2019 gastu ba eletrisidade tokon \$108 de'it. Gastu ne'e inklui manutensaun no operasaun tokon \$32, kombustivel tokon \$148 no liu husi infraestrutura hamutuk tokon \$17. Bainhira Governu halo planu no harii edifísiu ka infraestrutura seluk inklui estrada sira, presiza halo kalkulasaun kompletu hodi hatene la'ós de'it kapitál maibé mós kustu ba manutensaun no operasaun nian atu nune'e bele halo desizaun di'ak no adekuadu.

Ami sujere atu suspende Projetu Tasi Mane tanba bele uza hotu Fundu Petrolíferu ne'ebé iha no mós rekursu sira seluk ne'ebé tuir loloos bele uza ba dezvoltamentu ida ne'ebé produtivu, realistíku no sustentável liu. Iha Fundu Infrastrutura, governu aloka ona tokon \$5.5 atu muda comunidade sira iha Betano, area auto-estrada faze rua, no Beaçu, maski laiha alokasaun atu konstrui no opera projetu iha fatin sira ne'e. Projetu Tasi Mane tomak bele gasta osan liu biliaun \$18, no hirak ne'e seidak inklui kustu manutensaun no kustu operasaun. Ami husu ba Parlamentu Nasionál diskute ho kle'an konsekuénsia ba levantamentu sira iha OJE ba tinan hira tuir mai atu implementa komponente sira husi Tasi Mane.

Tabela 1. Osan gastu ona, iha orsamentu no sei presiza atu harii Projetu Tasi Mane.

Osan gastu ona, iha orsamentu no sei presiza atu harii Projetu Tasi Mane (tokon dolar EUA)								
Komponente	Fatin	Estatus	Gastu to'o 2018	Alokasaun 2019	Alokasaun 2020	Alokasaun 2021-2024	Kustu total kapitál estimadu	Persen-tajen iha OJE
Aeroporto	Suai	Harii tiha ona	70	10	9	4	100	93%
Baze Fornesimentu	Suai	Hein aprovizionamentu	6	10	5	705	850	85%
Auto-estrada	Suai-Fatukai	Harii tiha ona	267	50	4	4	340	96%
Auto-estrada	Fatukai-Beaçu	Seidak hahú	3	-	4	18	1,320	2%
Aeroporto	Viqueque	Seidak hahú	-	-	-	-	75	0%
Refinaria no pipa mina	Betano	Seidak dezeñu	3	-	2	6	1,500	1%
Pipa gas, planta LNG no portu	Sunrise-Beaçu	Seidak dezeñu	12	-	2	19	6,000	1%
Hola partisipasaun 57% iha Konsorsiu Greater Sunrise	Tasi laran	Impresta husi Fundu Petrolifeiru diretamente	-	650	-	-	650	100%
57% husi investimentu kapitál iha Sunrise upstream	Tasi laran		-	-	-	-	6,840	0%
Kustu administrasaun no sst.	Dili		49	12	50	50	500	32%
<b>TOTAL</b>			<b>410</b>	<b>732</b>	<b>75</b>	<b>804</b>	<b>18,175</b>	<b>11%</b>

Tabela husi La'o Hamutuk bazeia ba Livru Orsamentál 2018, 2019 no 2020, Portal Transparénsia, no ami nia estimasaun. Outubru 2019

### **Hametin sistema monitorizasaun molok aumenta osan**

Ami nota katak iha planu no programa Governu nian ba tinan hirak oin mai sei iha aumentu maka'as ba alokasaun orsamentu ba gastu balun no ami preokupa ho sistema monitorizasaun no avaliasaun ba gastu sira ne'e. Alokasaun orsamentu ba ministériu balun aumenta maka'as maibé la ho esplikasaun detallu. Hanesan ezemplu, alokasaun ba Governu Tomak, hatudu aumentu boot husi tokon \$108 (eskloi RAEOA) ba tokon \$239, liuliu iha alokasaun ba Counterpart Fund ne'ebé sa'e husi tokon \$5 ba tokon \$92 sein esplikasaun klaru. Parlamentu Nasionál presiza hatene detallu husi aumentu ne'e molok halo desizaun. La'o Hamutuk apresia kreximentu ba alokasaun orsamentu sira ne'e. Maibé presiza haforsa kapasidade implementasaun, monitorizasaun, no sistema akontabilidade hodi asegura katak alokasaun osan boot ba munisipiu no suku sira sei benefisia duni populasaun sira.

### **Labele husik tusan ba ita nia jerasaun oin mai**

Livru orsamentu 2020 inklui informasaun detallu liu kona ba empréstimu halo ona kompara ho livru orsamentu sira uluk. Maibé, seidauk inklui informasaun xave kona ba governu nia planu atu uza bareira foun ida ne'e (valor empréstimu tokon \$750) ne'ebé governu planu atu asina kontratu iha tinan 2020 (Livru 1 OJE 2020, p. 51, Versaun Tetum). Montante ne'e boot liu dala rua duké akordu empréstimu sira ne'ebé Timor-Leste asina tiha ona. Empréstimu bele fó impaktu boot ba ekonomia, no empréstimu la sustentável sei sai ameasa ba sustentabilidade finansas. Tanba ne'e, importante atu inklui informasaun no projeksaun ne'ebé loloos. La ho informasaun ne'e, ita la bele hatene impaktu husi empréstimu no labele foti desizaun ne'ebé matenek.

Maski Governu fó sai katak ninia nivel deve sa'e sustentável, projeksaun kona ba sustentabilidade deve la hatudu realidade. Parte 2.6.3.3 husi Livru 1, kona ba empréstimu iha futuro, falta atu temi Governu nia planu atu empresta osan barak liu no falta atu konsidera impaktu husi empréstimu tokon \$750 tan iha futuro ba orsamentu ba oin. Se ita deve tan tokon \$750 ho termu hanesan empréstimu sira agora nian, Timor-Leste sei selu maizumenus tokon \$78 kada tinan bainhira periodu grasa nian remata ona. Ne'e hatudu rasio entre reembolsa dívida ho reseita 35%, besik dala-rua husi bareira 18% ne'ebé hakerek iha Livru Orsamentu 1 no IMF/WB Debt Sustainability Analysis (DSA). Parlamentu Nasionál tenke ezije Governu halo klarifikasaun kle'an kona-ba objetivu husi empréstimu ne'e (mai husi ne'ebé, atu uza ba saida no oinsá atu selu fila fali). Maske figura 18 (livru 1) hatudu ona setór sira ne'ebé atu gasta

uza osan empréstimu ne'e, infelizmente laiha esplikasaun ba projetu spesífiku. Ami sujere atu Parlamentu Nasionál labele asina no aprova sira nia proposta ba limitasaun empréstimu.

### **Investe iha Rekursu Umanu no Servisu Báziku Sira**

Timor-Leste hahú ona progresu importante balun iha area edukasaun no saúde, hanesan elimina tomak moras polio no elimina hotu moras malaria. No alende ne'e númeru atendimento iha eskola aumenta. Maske nune'e kualidade edukasaun iha nivel primária to sekundáriu, sei enfrenta difikuldade en termu hasa'e kbiit manorin na'in sira, ne'ebé bele hasa'e kualidade edukasaun iha tempu naruk. Timoroan lubun boot liuliu hirak ne'ebé hela iha area rural, seidak bele hetan asesu ba bee moos. Ami hein ho orsamentu 2020, Governu Konstituisional dauwaluk bele prioritiza servisu báziku sira, hodi fornese moris naruk, saúde, hahán nutritivu ba ita nia emar tomak.

### **Edukasaun**

Ami apresia ME nia esforsu ba implementasaun husi kurríkulu foun ba ensinu báziku no ami enkoraja nafatin atu iha kriasaun kurríkulu foun ba manorin na'in sira, aumenta livru no formasaun ba manorin na'in liuliu iha nivel sekundáriu no tersiariu. Governu Konstituisional dauwaluk (VIII) deklara ona ninia prioridade atu haforsa liu tan sistema saúde, edukasaun no asegura povu Timoroan asesu ba bee moos. Mezmu ke alokasaun orsamentu 2020 ba setór edukasaun tinan 2020 aumenta 5.6% kompara ho tinan kotuk, ONU rekomenda nudár prátika internasionál di'ak atu aloka mínimu 15% husi OJE nia totál ba setór edukasaun,<sup>2</sup> maibé proposta OJE 2020 aloka 9.5% de'it ba edukasaun, inklui UNTL no bolsa estudu.

Iha tinan barak, Governu foka liu ba fornese bolsu estudu ba grupu estudante no funksionáriu balun iha rai li'ur, liu husi Fundu Dezenvolvimentu Kapítal Umanu. La'o Hamutuk louva FDKU ba iniciativa ida ne'e, maibé tempu to'o ona, atu tau matan liu ba investimentu edukasaun iha rai laran, harii no hadi'ak sistema eskola iha rai laran ne'ebé bele benefísiu ema wain liu tan, duké haruka estudante ho númeru ki'ik ba eskola iha rai li'ur. Tuir La'o Hamutuk nia hanoin harii eskola iha rai laran sustentável no efikás liu, no kria empregu barak, duké fornese bolsu estudu ba ema uitoan de'it.

---

<sup>2</sup> ONU foti rekomendasaun ne'e husi relatóriu Edukasaun ba Hotu (*Education for All –EFA*) nian ne'ebé rekomenda alokasaun ba edukasaun entre 15% no 20% husi totál alokasaun husi orsamentu estadu nian.

## **Bee Moos no Saneamentu**

Tuir Relatóriu DHS 2016, umakain 36% de'it mak hetan asesu bee ne'ebé seguru iha sira nia uma, kintál ou kintál viziñu nian. Tanba ne'e, maioria umakain presiza la'o distánsia balu hodi bele asesu bee moos no dala barak, feto no labarik sira mak simu todan ne'e. Aleinde ne'e, 21% umakain iha Timor-Leste uza fonte bee ne'ebé la serve atu hemu ka te'in tanba possibilidade boot nia hetan kontaminasaun. Governu tenke kontinua fó prioridade aas ba investimentu iha bee moos, liuliu ba comunidade sira iha area rurál, tuir kometimentu ne'ebé sira halo iha inísiu governasaun.<sup>3</sup> Kualidade investimentu iha setór ida ne'e sei fó benefísiu ba saúde no edukasaun, no mós sei hadi'ak kualidade moris, liuliu ba feto no labarik sira.

Asuntu bee moos sei sai nafatin preokupasaun ba sidadaun hotu-hotu, liuliu comunidade iha área rurál. Proposta alokasaun ba bee moos iha 2020 mak tokon \$32. La'o Hamutuk konsidera katak investimentu iha bee moos mak sai hanesan investimentu direta ba kapitál umanu, tanba bee ne'ebé kontaminadu no saneamentu la adekuaudu kauza problema saúde barak, inklui diarreia (tee-been). Diarreia bele kauza Malnutrisaun liuliu iha labarik sira. Diarreia króniku no malnutrisaun fó impaktu permanente ba ema nia abilidade atu aprende no mós redús produtividade laboral bainhira adultu.

Atu hadi'ak servisu fornimentu bee ba comunidade, parseiru dezentvolvimentu sira nia programa tenke alinha ho governu nia polítika. Ida ne'e presiza atu asegura sustentabilidade ba investimentu, monitorizasaun no manutensaun. Governu tenke asegura planu ne'ebé integradu, inkluzivu, no sustentável, no planu ne'ebé governu prodús tenke iha konsultasaun públiku hodi asegura katak comunidade rasik nudár na'in ba dezentvolvimentu hirak ne'e hetan duni benefísiu.

## **Saúde**

Alokasaun ba setór saúde hamutuk tokon \$104.2, ka menus liu tokon \$2.6 bainhira la inklui treinamentu no bolsu estudu médiku nian. Asesu ba saúde nudár direitu umanu, tanba ne'e ami rekomenda ba governu atu prioritiza setór ne'e hodi hadi'ak kualidade servisu saúde liu husi treinamentu profisionál kuidadu saúde sira, investimentu iha ekipamentu no infraestrutura, no mós treinamentu ba profisionál sira atu hanorin oinsá atu uza ekipamentu sira hotu, duké

---

<sup>3</sup> <http://timor-leste.gov.tl/?p=20162&n=1&lang=tp>  
<https://www.gpm.gov.tl/intervensaun-s-e-primeiru-ministru-taur-matan-ruak-ihajornada-orsamentu-2019-transkrisaun/#.XbiZpdV7nb0>  
<http://www.laohamutuk.org/econ/OGJE20/jornadas/LinaOrientasaunPMOJE2020-2023te.pdf>



entrega servisu diagnóstiku saúde ba setór privadu. Liu husi dalan ida ne'e, bele hamenus ita nia dependénsia ba halo tratamentu iha hospital sira iha rai li'ur. Governu mós iha planu atu implementa PPP ba setór saúde (servisu diagnóstiku saúde nian durante tinan 11 ho tinan ida ba fase konstrusaun no tinan 10 ba periodu operasaun). Maibé ita presiza iha liu tan diskusaun kle'an kona-ba konsekuénsia envolve modalidade PPP iha servisu báziku sira.

Iha sorin seluk ita nia taxa malnutrisaun - liuliu ba labarik sira - sai ameasa ba Timor-Leste nia futuru. 46% husi labarik tinan lima mai kraik mak *stunted* (isin-ki'ik) no 24% mak *wasted* (isin-krekas),<sup>4</sup> ne'ebé sukat aas no todan atu identifika malnutrisaun. Realidade katak labarik barak tebes iha malnutrisaun hatudu katak Timor-Leste presiza halo investimentu ne'ebé boot no efetivu hodi kombate malnutrisaun. Labarik sira mak sai rekursu ne'ebé ho valór boot liu ba Timor-Leste; investimentu iha sira nia saúde mak sai investimentu direta ba ita hotu nia futuru.

### **Promove setór produtivu mak dalan sustentável liu atu atinje governu nia objetivu sira**

Governu nafatin orienta ninia programa no orsamentu estadu hodi atinje ninia objetivu mantén kreximentu ekonomia liu 7%, hatún kiak 10%, no kria empregu ba ema 60,000 iha tinan 2020.<sup>5</sup> La'ó Hamutuk apoiu esforsu hotu atu hatún kiak no redús dezempregu, no fiar katak dalan di'ak liu ba governu atu atinje objetivu sira ne'e mak liu husi investimentu di'ak liu iha setór ekonomia produtivu sira hanesan setór agrikultura, turizmu no indústría ki'ik sira. Maski investimentu boot iha setór petróleu la garante kontribuisaun sustentável ba hamenus kiak. Esperiéncia no estudu barak hatudu katak setór ne'ebé bele kontribui másimu liu ba kriasaun empregu, hasa'e rendimentu no hatún kiak mak setór produtivu sira ne'e tanba sira iha ligasaun direta ho povu maioria nia moris no bele fó empregu ba traballadór barak.<sup>6</sup>

### **Agrikultura**

Agrikultura nafatin sai prioridade ida iha governu nia programa no governu aloka orsamentu tokon \$30 ka sa'e 9% husi tinan kotuk.<sup>7</sup> Ministériu Agrikultura no Peska (MAP) nia Orsamentu aumenta husi tokon \$14 iha 2019 ba tokon \$21 iha proposta ba 2020. Maibé orsamentu ne'e

<sup>4</sup> Demographics and Health Survey, 2016.

<sup>5</sup> Livru 2 Proposta Orsamentu Jerál Estadu 2020

<sup>6</sup> Christiaensen, L., Demery, L. & Kuhl, J., 2011. The (evolving) role of agriculture in poverty reduction—an empirical perspective. *Journal of Development Economics*, [e-journal] 96, pp. 239-254.

Laoyza, N. V. & Raddatz, C., 2010. The composition of growth matters for poverty alleviation. *Journal of Development Economics*, [e-journal] 9 (1), pp. 137-151.

<sup>7</sup> Inklui alokasaun ba MAP, FI, FDKH, Munisipiu, no RAEOA

ki'ik liu dala haat kompara ho alokasaun tokon \$88 ba Ministériu Petróleu no Minerais. Bazeia ba peskiza forsa laboral (LFS 2013), empregu ba agrikultura hamutuk 77,000, boot liu dala 64 kompara ho empregu iha petróleu no minerais (1,200), no número ne'e seidak inklui agrikultór no peskadór subsistênsia.

### **Turizmu**

Liga ba setór turizmu, La'ó Hamutuk suporta governu nia prioridade atu kria ambiente favoravel ba turizmu no promove Timor-Leste sai fatin distinasau atrativu ida iha Ázia Pasífiku. Maibé setór ida ne'e hetan alokasaun Orsamentu ida ne'ebé mínimu tebes bainhira kompara ho setór produtivu sira seluk. Kombina alokasaun orsamentu ba setór turizmu iha MTCI no Fundu Infrastrutura, orsamentu direta ba dezenvolve setór turizmu tokon \$3.7 de'it. Iha mós alokasaun seluk ba setór turizmu ne'ebé tau iha Gabinete Primeiru Ministru nia okos ho total tokon \$2.1 ne'ebé atu uza ba partisipa iha Feira International iha Dubai. Alokasaun mínimu ba setór turizmu ne'e la tuir Planu Estratéjiku Dezenvolvimentu Nasionál 2011-2030 ne'ebé konsidera setór turizmu hanesan setór xave ba dezenvolvimentu ekonomia. Aleinde alokasaun ne'ebé ki'ik, fatores sira hanesan implementasaun projetu infrastrutura sira sein estudu ambientál, planu esplorasau minerais no petróleu iha rai laran, no sistema agrikultura ne'ebé domina ho mákina boboot no input kímiku sira mós sei sai ameasa atu atinje objetivu governu nian iha setór turizmu.

### **Konkluzau no Rekomendasaun**

- Ami husu ba membru Parlamentu Nasionál atu hare no kuidadu ba definisaun sira ba despeza husi OJE 2020. Liuliu ba aumentu hirak ne'ebé signifkante maka'as hanesan iha transferénsia publika Ministériu Petróleu no Minerais no mós aumentu iha Fundu Kontrapartidas.
- Proposta OJE 2020 ne'ebé sei fó impaktu ba Timor-Leste ninia sustentabilidade orsamentál no ameasa durasaun Fundu Petrolíferu nian. Ami husu atu Parlamentu Nasionál tetu didi'ak proposta OJE 2020 antes halo desizaun.
- Presiza haforsa no hametin sistema monitorizasaun no kontrolu atu nune'e bele asegu implementasaun ba programa sira la'ó ho efisiénsia no efetivu hodi garante katak fó duni no maximiza benefísiu konkretu ba povu Timor-Leste.

- Ami sujere atu kontinua investe iha setór produtivu sira hanesan Agrikultura Familiar, Turizmu Komunitária, Indústria ki'ik sira ne'ebé bele redús kiak, malnutrisaun, dezempregu, no redús dependénsia ba importaun.
- Investe iha rekursus umanu liu husi hadi'ak kualidade setór sira hanesan edukasaun, saúde, bee no saneamentu hodi bele asegura povu Timor-Leste sai povu ida ne'ebé saudável, matenek no produtivu.
- Suspende despeza ba projetu Tasi Mane no avansa ba estudu independente ida ne'ebé bele halo estudu avaliaun ba kustu tomak, risku, benefísiu husi projetu ne'e rasik.
- Husu ba membru Parlamentu Nasionál atu la aprova envelope tokon \$750 ba akordu empréstimu foun iha 2020, se bainhira Governu la fó esplikaun detallu kona ba empréstimu sira ne'e ba saida, hodi halo saida no oinsá ho atu selu fila fali.

Ne'e mak La'o Hamutuk nia analiza no rekomendasaun sira kona ba OJE 2020. Ami espera buat ne'e ami fahe bele ajuda membru Parlamentu sira iha diskusaun kona ba orsamentu ne'e no mós bele halo desizaun ne'ebé sei benefisia povu Timor-Leste jersaun agora no mós jersaun sira ne'e sei tuir mai. Karik ita boot sira iha pergunta ruma ami disponivel atu diskute kle'an liu tan. Ba ita boot sira nia atensaun ami hato'o obrigadu barak.

Ami be saran lia,




Celestino Gusmão



Elizaria Febe Gomes



Bree Ahrens



Charles Scheiner



Berta Antonieta



Maxi Tahu



Marta da Silva



Mariano Ferreira



Adilson da Costa